

Lwgndae Hoengz lo

柿子红了

□ Maj Veiyungz comz hoiz

Swhliudoz



▲Lwgndae venj gwnz go.

Dwng Munghwngz ingj 邓孟恒 摄



▲Dak mak guh bingjlgwndae.

Dwng Munghwngz ingj 邓孟恒 摄



▲Swhliudoz: Vunzmbanj fonj lwgndae.

Gunghcwngz Yauzczuz Swciyen youq laeng baihdongbaek Gvangjsih, daengx yienh miz 2149 bingzfueng goengleix, dieg bo ciemq 22.91%、dieg bingz ciemq 27.4%. Dieg de bi ndeu miz 319 ngoenz mbouj roengz mwi, mbwnheiq ndei, gig habngamj ndaem lwgndae.

Gunghcwngz ndaem lwgndae gaeng ndaej 500 lai bi lo. Cib'it nyied, rumzbaek ngamq daeuj daengz, baihnanz guk raeuz hainduj bienq liengz bienq nit, gij mbaw go lwgndae caemh menhmenh reuqrat loeng roengz namh. Deq gij mbaw de loeng liux, gag lw aenmak venj youq gwnz go. Seizde, mwngz byaij youq diuz roennou lajmbanj Gunghcwngz, yawj coh baihyae, aenmbwn heunaunau, mbouj miz saek benq fwj, baihlaj, caenh raen baenz ndoi lwgndae hoengzfwgfwg, lumj doengh aen daengloengz iq venj youq gwnz nye, ndeiawj dangqmaz. Daengz seizde, gwnz haw couh miz lwgndae gai lo. Aenaen henjbyomh、naeng mbanq、noh na youh mbouj miz vaed. Caeuq gij lwgndae wng unqnemnem mbouj doengz, gij lwgndae Gunghcwngz gwn hwnjdaej byotbw, cix van cix hom, noh cix saed cix na, raemxmak lai, feihdauh ndei raeuh. Vunzmbanj mboujdan gai gij mak moq ngamq mbaet roengz de, lij guh bingjlgwndae bae gai dem, aenvih bingjlgwndae ce ndaej nanz. Seizhaenx, gak ranz gak hoh cungj swnh mbwn ndit ndei, coemj mbaet mak、gai mak、dat mak、dajlangh. Gyanghonz、dieg hoengq henz ranz、gwnz dingjranz daengj, dauqcawq cungj langh miz lwgndae, cungj mbouj miz saek gok hoengq bae. Daj gwnz sang yawj doxroengz, couh lumj fuk veh nei. Vunzmbanj yienznaeuz nyaengq-foedfoed, hoeng caemh guh dwk sim' angq najriu, aenvih cungj mak neix mboujdan ndaej mak lai caemhcai q gai ndaej bae、gai ndaej ndei. Vunzlai yienh de gig gyaез hek, caenh raen bouxhek couh dawz bingjlgwndae okdaeuj caih de cimz.

Vunz Gunghcwngz daengz seizneix lij aeu gij dinfwngz cienzdoengj ciuhgonq guh bingjlgwndae:

Mbaet mak、genj mak、swiq cengh、dat naeng、dak ndit、cawz heiq saep、nyaenq ok hingz、coux gang bae oemq daengj. Deq gij dangz ndaw mak iemq ok baihrog giet baenz caengz dangzhau le, bingjlgwndae couh guh baenz lo. Gij bingjlgwndae Gunghcwngz van lai, caengz dangz baihrog hausak lumj ronghndwen nei, ndigah vunz couh heuh lwgndae Gunghcwngz guh "lwgndae ronghndwen".

Minzgoz ngeihcib ngeih nienz, 《Yienh Ceiq Gunghcwngz》 geiq miz "dangznding、youzndip、youzcaz、youzfaex、lwgndae、duhhenj、ngeihgva hoengz dwg gij huqdoj mizmingz Gunghcwngz, ndaej gai daengz rogguek bae" "Sam cien sig lwgndae dij sei q fanh maenz ngaenzhau". Bi 1989, aen cwngfuj Gunghcwngz Yauzczuz Swciyen gujli vunzmbanj youq yanghonz henz ranz dajndaem lwgndae, seizde daengx yienh cungj hwngq "ciengx mou、guh cauji、ndaem lwgndae". Geiq cib bi gvaqdaeuj, Lenzvah Cin、Sihlingj Yangh、Gyahvei Yangh couh miz baenz ndoi baenz ndoi lwgndae, dwg rangh dieg yienh de ok lwgndae haemq lai ndeu. Vihle bang vunzlai demsou, conhyah dieg de dazyinx vunzmbanj dawz lwgndae ronq baenz benq roxnaeuz baeng gai q gyagoeng baenz makrengj gai. Bi 2003 doxdaeuj, Gunghcwngz aeu doengh ndoi lwgndae neix hwngfat lijyouz, youq ndawco cib nyied daengz ndawnyied cib'it nyied guh cietlwgndae Gunghcwngz, guh ok diuz canjnieblien lwgndae swngheanj、gaicawx、gyagoeng、daehyinh、lijyouz、nungzcangh guhcaemz doxcaemh ndeu.

Youq Gunghcwngz, mboujlwnh dwg saehndei guekgya roxnaeuz saehhoengz gak ranz, vunzlai cungj maij soengq lwgndae. Aenvih lwgndae gangj Vahgun caeuq cihsaw "事" "世" daengj yaem doxdoengz, soengq lwgndae couhdwg nyienh mwngz "saehsaeh hab'ei q" "seiqsei q an'onj" daengj. Lwgndae caeuq gij vwnzva、ndwenngoenz vunz Gunghcwngz doxgyau doxyungz, caemhcai bienqbaenz aen geiqhauh Gunghcwngz. Lwgndae hoengz lo, saedceij vunzlai Gunghcwngz caemh hoengh lo.



▲Gunghcwngz guh cietlwgndae. Fei li ingj 费丽 摄